

OLA

PULETINI A'OGA



20 NOVEMA 2023 ~ Lomiga 18 ~ Upega Tafailagi: www.ola888.com ~ Telefoni: 0210364322 ~ Tuatusi: ola.niupac@gmail.com ~ evaleon.books@gmail.com ~ NIUPAC Publication



FONOTAGA 51 A LE OCIES: Sa talimalo ai le Lunivesite Aoao a Samoa, auai usugafono mai atunuu e 10 aofia ai motu o le Pasefika, auai taiulu o a'oga mai fafo. Ata NUS

Maoa'e taleni faatufugaga e molia le fe'au faalekelope

O se tasi o faaaliga (show) e le tupu so'o i Samoa nei lea sa taulamua ai le Saofa'iga o A'oga a le Lunivesite Aoao o Samoa, i le amataga o Novema. Molimauina e le pulega, o faia'oga ma le mamalu o Samoa i matua sa auai, e mautinoa e le o se tauvaga tausala a o se faaaliga o taleni e fa'aaoga ai soo se mea ua lafoa'iina e iai pepa, pelesitika, fasi ieie, ma mea faapena, e toe fatu ai ni mamanu fou o laei. E pei ona atagia i le igoa, Trashion Refashion Show, o lona sini taula'i ma le fe'au taua, ia faalalo le faiotaota e ala i le toe faaaoga o na mea nai lo le lafoaiina.

I le Potu Fono o le Niule'a na faataunuu ai le faamoemoe ma molimau ai le 'auvalaaulia ma matua i le maoa'e o le taleni a fanau a'oga. O i latou nei o loo aveina kosi o le tekonolosi HFT004 ma le HFT101, e patino i le faaaogaina o laue.

O se tasi vaega o le kosi o le faamautuina o le mau i le sootaga o otaota ma auala e puipui ai le si'osi'omaga mai le faafitauli ogaoga o lapiasi e lafoa'iina. E iloga le sogasoga i le potu e faaaoga mea tuai e toe fatu ai ni mea fou. O le lu'i lea mo fanau o loo aveina nei kosi, ina faailoa mai so latou ma'elega i faatinoga o a latou galuega. O le faamoemoe lea o le afiafi e pei ona togia.

E tolu vaega na vaevae ai le tauvaga 1. O Ato Pelesitika 2. O Oloa ma Afifi Pelesitika 3. Pepa



E molimau lava le ata i le aano o le tauvaga e pei ona galulue ai le fanau a'oga ma faia'oga

Lafoa'i. Sa faamasino mamanu e fua i le faaaliga o le taleni, le sootaga ma le si'osi'omaga, le aoga ma le anagata, atoa le onomea matagofie o le galuega.

Saunoa le Pule Sili, Polofesa Tuifuisa'a Patila Amosa i lea afiafi, e faamalo i le fanau a'oga sa tauva. Sa ia ta'ua le tulaga ese o lenei fa'aaliga, aemaise o le sini mauuluga o le fe'au i le faalaloina o le otaota lafoa'i o se faafitauli faalekelope. Molimau foi le tama'ita'i faia'oga o loo a'oa'oina nei mataupu, Laeimau Tauti Peru Tugaga, i le taua o le faaaliga mo le fanau. E le

gata e atia'e ai tomali moomia e pasi ai, a o le fe'au momoli e pei ona saunoa le Pule Sili. Na saunoa foi le Matua o le Saofa'iga, Tavu'i Dr Faamanatu-Eteuati, e viia le loto finafinau o le autauva. Sa molimauina foi le manuia o le faamoemoe i foliga fiafia o matua sa lagolagoina o latou alo i lea afiafi.

E autasi le auvala'aulia o se afiafi manuia ma tausaaafia lona taunuuga. Ae sili ai o le fe'au taua sa foi ma matua, i le taua o le sootaga o otaota ma mea tuai ma le toe fa'aaogaina i nisi mamanu fou o se tali atu i le faafitauli ogaoga o le faaonaina o le si'osi'omaga i lapiasi lafoa'i. - Saili Aukuso

TALA A'OGA I LE LAUMUA LE PAPAIGALAGALA: LEVI TAVITA

O se ripoti mai le Fonotaga Iona 51 OCIES i Apia 2023

I LANA FONOTAGA Iona 51 na filifilia ai Samoa e talimalo i lenei tausaga, e fa aso, 14-17 Novema, avea ai le Saofa'iga o A'oa'oga, a le Lunivesite Aoao a Samoa ma talimalo i lenei fonotaga taua.

Muamua, o le OCIES (Oceania Comparative and International Education Society) o le sosaiete faavaomalo a'oga e aofia ai Samoa. O lona sini maualuga, ina 'au'aufau faatasi malo ma nuu tauatia'e, e ala i le faasoaina o alaga'oa ma atamai mo le manuia o ona sui i le itulagi Osiana.

O lana manulauti o lenei fonotaga 51, ua faaigoa, Quality Education for Sustainable Futures: Comparative Dialogue [A'oa'oga 'anoa mo ni Lumana'i faaaauu: Talanoaga faatusatusa]. O loo manino i le manulauti le faatauaina o a'oa'oga 'anoa o se sini faalekope, e faama'ite e suiga o'oo'o i a'oga, le tamaoaiga, faalenuu ma faaleaganuu ua aafia uma ai le lalolagi.

Ua iloa le tulaga lamatia o a'oga i malo tauatia'e e mafua i le 'uti'uti o alaga'oa ma le 'aufaigaluega.

Ua iloa lava foi le sao o le A'oga i le sailiga o ni fofo o nei faafitauli. I le mauaina e tagata o se atunuu o se a'oa'oga lelei, o le a faamanaina ai i tomai, silafia ma agavaa e fai ai filifiliga lelei mo i latou ma aiga.

I lona faavaa lautele, ua ave ai e le fono 51 le faataua i upu e lua, 1. galulue faatasi [collaborate] ma le 2. faasoa le atamai [sharing knowledge]. E talitonu le fono o poutu nei i le ausia o le sini maualuga e pei ona folasia. Aemaise i le taliina o le fesili autu, E faapefea ona tapena ma faatino ni a'oa'oga 'anoa mo fanau i lenei vao suiga o le taimi ma faiga?

E silia i se 10 atunuu na auai ni o latou usufono, mai Suetena nisi, Amerika, Ausetalia, Niu Sila, ma o tatou tua'oi Pasefika. E le itiiti i se 200 le aofa'i o sui usufono mai fafo.

E tusa ma se 90 pepa na folasia i totonu o le fa aso o fonotaga, o na e fesaua'i o latou autu ma le manulauti o le fono. E lima soa-autu sa avea ma faavae o faasoa. 1. A'oga Tulagalua, Maualuga ma Teseri 2. Aga Silisili ma Sootaga i A'oga 3. Suiga i le Tau ma Atina'e tausaga lelei 4. A'oga tomai faapitoa ma le Autalavou, ma le 5. Leo o Faia'oga, Tilotilo ma Faamalosisiga.

O tootoo aami o le fono o le afioga i le minisita ia Agaseata Valelio Tanuvasa, aso 1; le alii polofesa Toeolesulusulu Damon Salesa, aso lona 2; ma le polofesa ia Zane Diamond, aso lona 3. E femolimaua'i a latou mau i le taua o punavai auliuli a tagata Osiana lava ia i le atina'e o nuu ma malo e ala i A'oa'oga. Avea foi le fono o se avanoa lelei e feiloa'i atu ai i le afioga ia Toeolesulusulu, o se tasi tamafanau a Samoa, umia le tofiga Pule Sili o le Lunivesite AUT i Aotearoa Niu Sila.

Saunoa le susuga i le faia'oga, Dr Epenesa Esera, i lana folasaga, i le taua o le fono, e aumai ai i lumamea mataupu e fai i ai le faasoa faitele a usufono, ma maua ai auala ma faiga e fo'ia ai faafitauli i le vaai faa-Pasefika.



E 10 atunuu sa auai o latou sui, mai Suetena i Europa ma Amerika i le konetinetu matu ma le Pasefika foi



Avea le fono ma avanoa e fetufa'i ai potomasani i tu ma aganuu eseese e iloa ai le itulagi OSIANA



Afioga a le Sui Pule Sili, Peseta Desmond Lee Hang, Ta'ita'i sauniga Rev. Lafolafoga ma nisi o sui usufono

Ua iloa lava le taua o le talanoa ma faasoa, ae sili ona taua le fesoota'i e ala i fonotaga faapenei, mo tatou e tali tutusa lu'itau ma faafitauli, saunoa foi le susuga i le usufono, Pauline Luafutu-Simpson, mai Kalaiesetete.

O le tele o faasoa o le fono e faavae lava i su'esu'ega a sui usufono sa fai, o isi foi e faailo a latou su'esu'ega o loo ua tauafua, ae maea e tasi

lava i le manulauti o le fono, aemaise foi o le taula'iga o na sailiga i le atina'e o fanau Pasefika.

Mo usufono Samoa mai Niu Sila ma isi itulagi, o se avanoa e asia ai fo'i aiga ma uo i Samoa.

Na lululima i le toe aso ma taape le fua i le manuia, i faamanuiaga a le faifeau-faia'oga, Rev. Malotau Lafolafoga, o le lupe i lona itulagi, se'ia toe fuifui faatasi i le fono 52, i Solomona.

TALA A'OGA I LOU VAIFANUA: SAILI AUKUSO

Momoli e le sulu le fe'au o le filemu ia Samoa

O LE VAIASO na se'i mavae na faatini ai le molimoliga o se sulu i Apia, ina ua so'o le motu o Upolu i lena galuega alofa.

Amatamea le Samoa Victim Support Group, na laga'i le faamoemoe i le masina o Oketopa, e ui atu i sasa'e i le Anoama'a, ma faasolo ane ai i Aleipata ma Falealili. A o le faaiuga o le vaiaso talu ai na taunuu ai lona moliga i tuamaota o le Fale o le Malo i Matagalalua.

O le Minisita o Tina ma Tama'ita'i, Afioga Mulipola Anarosa Ale-Molioo na saunoa e faailo le taunuuga manuia o leni faamoemoe taua.

"E lē ititi le silasila a le tatou Malo i galuega o loo gapatia ai a tatou faalapotopotoga tuma'oti e ala i faatinoga ma polokalame eseese mo le manuia lautele o tagatanuu.

"O le Faalapotopotoga a le Toomaga e lē tau faailo lo latou sao mo le soifua manuia ma le saogalemu o tagata faapea ai i latou o i tulaga ma'ale'ale e aofia ai tina ma fanau, aemaise i latou e iai aafiaga tumau o le soifua.

Saunoa pea Mulipola, "O faamaumauga o ituaiga eseese o sauaga i le lotoifale aemaise le ogaoga ma le lautele o aafiaga o leni faafitauli o loo mafai ona manino ai le fuainumera mai faamatalaga ma faamaumauga."

O lana e saga faamatala le taua o le fe'au i tua o leni kemupeni, aemaise o le naunauga e tineia tu ma aga o faiga sau faasaga i tina



APIA: Sui o nisi o a'oga a le atunuu sa molimolia le sulu i le si'ui o lana taamilosaga na soo ai Upolu. Ata—Radio Samoa

ma tama'ita'i, ia 'aua ona toe aliali a'e i Samoa.

O leni faatinoga sa faailo ai le lagolago a le atunuu e ala i le auai o tama ma teine talavou, o a'oga ma aulotu, i le molimoliga o le sulu. Molimau ripoti a le 'aufaasalalau i lena fitaituga e lei mafai e timuga ma le la vela ona taofi.

Sa o'o lava le sulu i le atu Fagalua ma afioaga tumamao e pei o Tiavea i Aleipata. E 28 nuu o le atu Falealili ma Siumu na laasia i leni taamilosaga a le sulu.

E 'autasi su'esu'ega i le mataupu i le sauaina

o tina ma tama'ita'i i Samoa. Fai mai le UN Women Asia-Pacific, e tusa ma se 46 pasene o tama'ita'i Samoa e faito'alu pe iai i ni mafutaga, e feagai ma sauaga. Sauaga e ala i le fasi e 38 pasene, sauaga i faiga feusua'i i mafutaga ma faigauo e 20 pasene, ma sauaga i upu ma faiga e aafia ai lagona, e 19 pasene.

I leni kemupeni 'Taofi Sauaga' a le SVSG, e mautinoa o le a fai sona sao i le tapu'eina o loto ma mafaufau o fanau i leni faafitauli tuga, pe a le o le 'aumatutua o loo faia lea amio.

Faumalo pea a'oga i Apia i e ulufale i le Kolisi

O LOO FAUMALO PEA a'oga i Apia i fanau e ulufale i le Kolisi o Samoa. E molimau le lisi o le 2024, na o sina pasene faatauavaa o fanau mai a'oga i Salafai, ma Upolu i tuā, ae e mafuli lava i a'oga i totonu o le taulaga.

I le lisi 2024, e to'avalu i Upolu, o i latou e o mai i tua atu o Saina ma Toamua, ma Vailele; se i vagana le sui e to'atasi mai Saanapu, tolu mai Savaia Lefaga, tasi mai Fusi Safata, ma le to'alu mai Falefa, o isi uma itumalo e leai ni sui.

Ae maua sui o le motu tele, i le to'atasi mai Lano Primary, to'atolu mai Palauli, tasi mai Salelologa, ma le tasi mai Vaiola.

E lua a'oga e mamao i luma, le Samoa Primary (28), ma le Apia Primary (29), pipii atu ai le Peace Chapel (25), ma isi e iai Vaivase Primary (18), ma Vaimea e 13. O isi a'oga tutaulaga e iai Vaiala Beach e 7 ona sui, SDA Lalovaea e 6 ona sui, ma St Peters Chanel e to'afa.

E foliga o le mamau lea o loo fai ai le su'iga 'ula o leni su'ega ulufale, mai lava i tausaga e tele. E manatu se alii faia'oga o se faailoga lea o le tulaga le tutusa o loo ta'oto ai a'oga i Apia ma na i nuu i tua, ma Salafai foi. Sa iai le taimi na



Vaiola Primary o se tasi o a'oga tulagalua i le Faasalele e igoa ai foi se kolisi i lalo o le faatautaiga a le Ekalesia Mamona

malosi mai ai fo'i le finau a a'oga i Salafai ma tuā, ae e foliga ua mamao lava le talaga o le va, saunoa le faia'oga.

O loo avea pea le Kolisi o Samoa ma fua aoao o ausiga a fanau, i le pasene pito i luga, avea fo'i ana su'ega ulufale ma faailoilo o le tulaga o a'oa'oga i le salafa o le atunuu.

E pei ona saunoa le faia'oga, e le o paleni le

faasoaina o taleni ma tomali, o loo faaputupu tu uma lena taleni i totonu o Apia ma nuu tutaulaga.

Tuu ane foi i alaga'oa, e sili lava Apia. Afai fo'i e au le tama poo le teine i se a'oga i Apia, ona alu atu foi lea i Apia ma saga faaleleia ma ta'uleleia ai a'oga i le taulaga. E uma ane foi ua avea ma se e nofo mau i Apia, ma saga faaleleia ai lava le taulaga.

Faasoa o le Vaiaso: Lau Lau faatonu OLA

E faapefea ona tapena ma faatino se a'oga 'anoa?

O LENEI LE FESILI AUTU o le Fonotaga a le OCIES 51 sa talimalo ai Samoa i le vaiaso na se'i tuana'i. Sa tumutumu ai le tatou iunivesite i usugafono mai fafo.

Avea ai le fesili o i luga ma 'au'au o faasoa ta'itasi uma na sasa'a ai le tofa ma le faautaga a sui usufono sa faipepa, ae faapea foi le faasoa lautele a le 'aarusufono sa auai.

Upu moni e le faigofie ona 'apo le sosia ma le tamaoaiga o faasoa ta'itasi, aemaise i le faauigaga o le upu 'a'oga 'anoa' 'quality education,' ae talitonu foi e le faigata ona tatou mate'ia lona uiga.

Uiga lata mai, i fua o faaleeleaga pe a gaosi ma iloa ai pe mapo le talo, auā tusa pe ausiusi mai fafo ae a faaletonu le aano, e maumau le tautiga o le 'au tapena. E fua le lelei i le galuega a le faifaato'aga atoa ma le tulaga o le fanua. Ae iloga le faifaatoaga na te iloa ona faalelei le fanua, ina ia fua mai ni fua, pei lava o le faia'oga, i lona si'omaga ma le matafaioi.

Sa faataua i le fonotaga le upu 'faatusatusa.' Atonu o le sailiga mo le 'aufaitonu a le OCIES i nei aso, ina toe tepa i tua i le tulaga na sau ai a'oga, ma faatusatusa i aga o nei aso ma suiga. Tepa i tua i le 50 tausaga na iloa ai le aano lelei o le faitau tusi ma le tusitusi. Ui e na o le pi faitau ma le api ma le peni. I nei aso o le mau meafaigaluega, o auala eseese e a'oa'o ai, o le mau apps e avanoa i ai fanau, ae o loo atili ai ona fai ifo tomā faitau.

Molimau iunivesite i lona pagatia i tomā faavae Literasi, i fanau e ulufale mai e matuā mativa nisi i na tomā aupito moomia. E faapefea ona tusi se ese 2500 upu pe afai e leaga le sipela? Pe le ua soona inivesi i le tekonoosi ae galo ai le 'a'ano e maua i auala masani o le talanoa ma fanau ma faasino i ai le tusiga o le mata'itusi? E maua i le to'aga e faitau tusi ma umia se tusiupu lelei? Pe le o le tali e maua i le auala faigofie, nai lo le mau auala ma le mau alaga'oa faaonaponei ua su'e ai tupe a le 'aufaioloa?

Ona tula'i mai lea o le faia'oga i lona ata o le upu 'anoa, 'anoa faape'i le faia'oga? Tatou te toe tepa foi i tua ma fai lona faatusatusaga. Upu moni, e sili atu mea ua silafia e faia'oga i nei aso nai lo pa'aga i le 50 tausaga tuana'i, ae a talanoa i le 'anoa, e le pine e iloa gofie lona eseese. Pe le o le faigofie lona ua le toe maua i nei aso 'ona o le mau filifiliga i auala ua lofia ai a'oa'oga ma tapenaga?

Uiga o le tala, e le o auala uma e aoga, e iai foi auala fou ua iloa le aogā ae le o auala uma.

Ae e le tuua'ia le faia'oga, auā i nei aso ua faamoemoe le tapenaga i le malo ma lana faasoa tausele, atoa ana fuafuaga mamao.

A ua mana'o le malo i ni talo lelei (tulou), e tatau ona inivesi i lona tapenaga e tino mai ai. A ua faameo le malo i le pa'ū maualalo o ausiga a fanau, e lelei ona amana'ia mana'oga o a'oga ma faia'oga. E le na o tupe e faalelei ai le 'a'ano, ae taua le sao o le faasoa tautupe i ausiga manuia.

E taua le vaai mamao. Se fuafuaga tuutuu mamao e tali atu i le maoa'e o lu'itau o le asō.

I aso la, sa galulue faia'oga e aunoa se lagona faapopoleina pe faamuta le konekarate. Aso nei ua omia i le lagona luafesasi, pe a maualalo le numera o fanau e pasi, meaane e le o sona sese a o le maualalo o tomā literasi o fanau e faatino ai su'ega. Ona fa'aosoosoina lea e faapasi se tama poo se teine, ona o lona faanaunauga i le pulega poo le malo foi, e si'i i luga le numera o le 'aupasi. O le iuga, o le tosoa'iina ai i lalo o le fuataga moomia o se a'oa'oga 'anoa ma amana'ia. E ta'imua malo lelei atia'e i lea amio.

E auala foi le a'oga 'anoa i le fetufa'i o manatu ma faiga, i sootaga faavaomalo, pei ona matau i ai le OCIES i ona sini faavae. O le 'auga lona o faiga mea, ia le na o le upu a o faatinoga. Iai nuu o le OCIES e mauoloa i tupe ma alaga'oa, e mafai ona fesoasoani e faalelei lona ava i malo vaivai.

E faapefea ona fa'aaoga lelei sosia o sootaga faipa'aga e fa'aopoopo i le aano e faalelei ai a tatou taumafaiga? O se lagona e faapea, tatou te le oge i auala ma faiga e faalelei ai le 'anofale o a'oga, ae e mana'omia le tupe ma fesoasoani faapena e tino mai ai.

Ae sili ona iloa le 'anoa i le 'auga o aute ma le taunuuga o a tatou taumafaiga, le fanau o loo nofo mai i ou ma o'u luma. Tele tusipasi e maua i le mafaufau atamai, maua ai se 'aufaigaluega atamamai e faia galuega a se atunuu, ae iai fanau e lei ulufale i ni iunivesite ae e manuia a latou taumafaiga i pisinisi pe i tofiga faalenuu faalelotu e tautua ai.

O le uiga o le taofi, e le fuaina le 'aano lelei' i le na o le tele o pasi, ae fua foi i le iuga o se tama ma se teine, i le olaga tautua poo le a lava le faiva, i le faiaiga lelei ma aveva o se tagatanuu lelei o lona atunuu.

A o taufao e malos'i'aga fou fa'atekonolosi mafaufau o fanau, e au ina galo mea taua tau le loto. Lea na talanoa ai Pauline Luafutu-Simpson i le alofa, fa'aaloalo, tautua. Le taua o le Gagana a se tagata, pei ona faasoa Ah Tong ma Dr Tavu'i Faamanatu-Eteuati i le toe aso.

O le faia'oga ta'uta'ua o Aristotle e ana le upu, "A e a'oa'o le mafaufau e aunoa ma le loto, e le o se a'oga atoa lona." Ua na o se tagata e mafai ona a'oa'o le loto o le isi tagata. E le mafai e se ropati AI ona fai, ui e mafai ona ia faapoto se tagata, maua ai sona tusipasi maualuga.

O nisi ia o popolega sa faaleo e le alii polofesa ia Toeolesulusulu Damon Salesa, i le tula'i mai o nei pule fou e lu'iina le ta'otoga o mea ua iai.

Ma le toe vaega lenei, o le sao o se malo i le faalelei o le 'a'ano. I le tuliloaina o sootaga ua iai, e pei ona faama'ite e pulega faavaomalo e iai le OCIES, ma isi foi, e mafai i sootaga faamalo ona molia upu e aveva ma ni moni tino mai.

E taua fono, e taua le feiloa'i, ae fia vaai foi i ni fua vaaia ma tino mai o na talanoaga, saunoa Tofilau Dr Faguele Suaalii, faatonu o le fono i lona tapenaga. O lea e ta'u mai ai le taua o ta'ita'iga faalemalo ma sootaga faavaomalo i lenei sailiga mo le 'a'ano aupito lelei i A'oa'oga.

TALA A'OGA MAI AOTEAROA



OTOOTOGA

O se faafitauli le lē a'oga o le fanau

O loo aveva pea le tia'i a'oga o se faafitauli e le alu ese mai a'oga a Niu Sila. I le kuata lona 2 o le 2023 e na o se 47 pasene o tamaiti na auai i a'oga, tusa ma se 7 pasene e si'itia ai mai le 2022 taimi e tasi. O le fua masani o le auai o fanau e tatau ona 90 pasene, ae pei ona molimau fuainumera, ua fai lava si pa'ū maualalo.

Su'e galuega le 'au le a'oga

O se pasene feoloolo o le fanau ua le toe a'oga ua aveva nei ma ni e saili galuega, molimau mai tautua e nafa ma lea tiute. O nisi e na o le ta'i 12 tausaga ua tu'itu'i i faitoto'a o falefaigaluega, ma o se popolega fa'aalia lea i pulega o a'oga, pe afai e alu ai faapea. Ua tālia se finagalo o le minisita fou i se faiga e tali atu ai.

Folafolaga a le National i telefoni

O le tasi o folafolaga a le National pe a tu mai i le palota, o le vaoia lea o telefoni i totonu o potua'oga. E talitonu Luxon e iai le sootaga o le telefoni ma ausiga lē tau e pei ona molimauina i sailiiliga. O lenei vavao e faatino lava e le a'oga ia, ae e tatau ona aveese le telefoni mai lima o fanau a o le'i amatā le a'oga.

Lapata'i Asosi o galuega faufautua

Ua lapata'ia le malo e le Asosi o galuega faufautua (counselling) e taga'i i le tulaga o loo feagai ma lana 'aufaigaluega i lenei taimi. Ona ua faia'e le mana'oga i totonu o a'oga ae to'alaitiiti le 'aufaigaluega, o lea ua afaina ai i latou. O le fautuaga a le asosi, ua tatau i le malo ona fa'aopoopo le numera o le 'aufaigaluega.

Faumalo pakeha i fausaga tekonoosi

I se ripoti i le mataupu i le tekonoosi ma fausaga o le lumana'i, ua ta'ua ai le faumalo o papalagi i le galuega o fausaga faatekonolosi. Na o le 4 pasene o tagata Maori e aafia i lea fe'au ae 3 pasene o tagata Pasefika. O le popolega fa'aalia, e foliga e le o aofia tagata uma i se fa'aaliga mamao, pe a manatu i sea faumalo.

Faatau fale e totogi ai aitalafu

Ua sauni le iunivesite a Ueligitone e faatau atu ni meatotino, e aofia ai ni fale mo tamaiti a'oga, e faatumu ai se tinoitupe toese, e \$36 miliona.

Ne'i Mea Ane ua Galo

E manatua le fatua'iupu ma ni pu'eata sa nonofo i Samoa



MAUTINO A E UMI ONA MANATUA se fatua'iupu ma ni pu'eata sa nonofo i Samoa. Ua tali atoa ai le 130 tausaga talu le maliu o le misionare lausilafia i li'o a'oga ma su'esu'ega, sa galue i Samoa, Rev Dr George Pratt (ata) ae iloa e Samoa ia Misi Parate. E mafai ona faapea atu, e leai se Misi e iloga lona lauiloa o e sa galulue i Samoa e pei o Parate. Pe mafua lea ona o lona sao i le gagana a Samoa i lona atiina a'e o se gagana e mafai ona tusitusia ma faitauina.

Muamua i le saunia o le ulua'i tusiupu ma le kalama o le gagana. Lua, i lana galuega faamaopoopo i le tuufaatasiga o le Tusi Paia Samoa. O nei galuega ta'uta'ua ma le taua o loo fa'aogaina pea ma avea o ni faamanatu i lana tautua. I lana tusiupu, na molimau Parate i le iai o se sootaga o lona naunau ona o mea e foliga tutusa ai le aganuu a tagata Eperu anamua ma Samoa. E iai le faiva o lauga, le taua o le tootoo, le tu o le peritome, o aga o taua, ma le mataupu o le feagaiga.

Auina mai i lalo o le faatonuga a le Sosaiete misionare Lonetona, LMS, tuua Egelani ia Novema 8, 1838, ae taunuu i Apia ia Oketopa, 1839. Na mua'i galue i Matautu Savaii ma alu ai avea ma taiulu i le fe'au o le liliuina o le Tusi Paia i le gagana Samoa. Galue foi i Niu Kini, ma Niue mo sina taimi, na ia liliuina ai se vaega o le Feagaiga Fou i lea gagana. Ta'ua foi i faamau lona asia o motu o Loialiti (Loyalty) ma mau ai mo se taimi.

A o le 'au'au o lona tautua o Samoa lea; e 40 tausaga na galue ai, i le nuu o Avao sa tele sona taimi sa nofo ai. O i laua ma Misi Nisipeti na toe iloiloa le Tusi Paia atoa a o lei tuuina atu mo le lomiga o se tusiga e tasi.

I faamau a Parate, a o nofo ai i Samoa, e molimau ai i ni laasaga o suiga o'oo'o i le gagana. Mai le gagana tautala i le tusitusi, atoa foi le liliuga mai le leo Samoa auliuli (t & n) i le k ma le g poo lea ua ta'ua o le 'tautala leaga.' Na fa'aalia sona taofi ta'utino i lea maumau. E manino le molimau a Parate i lenei suiga o se mea e afua i leo mai fafo, le k ma le g, na alu a'i avea ma se leo faumalo.

Ae le na o le Tusi Paia ma le tusiupu lona sao, o iai fo'i ana tusitusiga e faatatau i le vao mataupu tau Samoa; o ia foi o se fatupese o le lotu tauafua.

E 5 tausaga o Parate i Matautu ae maliu lona to'alua, Mary Parsons Hobbs, ona toe faaipoipo lea ia Elizabeth Bicknell. Tu'ua le galuega ae malolo atu i Sini, ia Aperila 1879, maua nisi asiasiga i Samoa o se failauga o le talalelei, ae maliu i le 1894.

Mulia'i ae le itiiti le sao o se tasi alii Niu Sila sa na avea foi Samoa ma ona nuu fou. O Alfred John Tattersall sa soifua i le aai o Aukilani, 29 Mati 1866. I lona 20 na malaga atu ai i Apia e galue i le falepu'eata o le papalagi Egelani, John Davis. Ina ua maliu Davis ona fa'aauu lea o le pisinisi e Alfred, ma avea ai ia o le pu'eata tusaafia a Samoa mo se 50 tausaga o lona tautua.

Na ia molimau i nisi o taua tetele a Samoa, le afa tele o le 1889, le sisigafu'a o le 1900 e amata pulega Siamani, le to'ai taunuu o le fitafita a Niu Sila i le 1914, le faama'i tele, atoa ma le Mau.

O nei uma sa pu'epu'emaia i ana ata e tele ua avea ma molimau faitino i le talafaasolo o Samoa, i ia fatia lualuta



~ NOVEMA 16-30 ~

16
1933 Laga le maota o Taisi OF Nelson i Tuaeufu e leoleo a le malo

18
1880 Tofia Malietoa Laupepa ma tupu
1918 Aso Gafua. Toe o Apia atoa faata'otolia i le faama'i. Na o le 7 faipule mai le 31 o le Fono na sao mai i le faama'i oti (Samoa Times)
1946 Tete'e Samoa atoa i le maliega o lona vaa-vaia ae talosaga mo le pulea o ia lava
1974 Tanumia se aiga to'afitu i Solosolo i se solo eleele ona o lologa

19
1883 Tusi Malietoa i le tupu tama'ita'i Egelani Vitoria mo lana pule faamalumu leai se tali

20
1839 Fasia misionare Ioane Viliamu ma Alisi e tagata o Eromanga a o taumafai e fesoota'i
1918 Te'ena e Logan le ofo a le malo Amerika Samoa e fia fesoasoani i togafiti o le faama'i

21
1972 Aso soifua To'aletai David Tua

22
1858 Faalava'au se matai o Palauli i luga o le manua o Peretania HMS Cordelia ona o le maliu o se faiolea Egelani William Fox 1856

1933 Molia Taisi OF Nelson i le foomalo 23
1998 Tauaao tusi faamavae a Tofilau Eti i le palemene i mafuaaga o le soifua maloloina suia le tulaga ta'ita'i e Tuilaepa Sialele 24
2001 Manumalo le Manu Samoa ia Italia 17-9 i le malae o Fattori i Roma 25
1894 Aso Sa i Sini. Maliu le alii misionare Misi Parate [George Pratt] lona aiga i Sini, 77
1944 Tapuni nofoaga o le malini i Samoa i sisifo foi atu le lunite 111 o tapenaga i Tutuila
1951 Maliu alii pu'eata o Alfred J Tattersall i Apia teu ai
1994 Tatala maketi fou i Fugalei
2000 Ulua'i malaga a le vaa Polenisia—Island of Upolu Apia/Aukilani/Sini/Apia 26
1931 Tatala se falemeli fou i Matafele
1974 Maua se nofoaga Lapita i Mulifanua 27
1957 Ulua'i fono paea'iga lona 4 Samoa
1971 Taunuu i Apia le vaa Polenisia 'Pili' 29
1970 Asia Samoa e Pope Paulo le VI 30
1902 Ulua'i lomiga Fetu Ao Metotisi

i ona upufai.

Faatasi ma ia le isi foi alii pu'eata Niu Sila, lauiloa foi, Thomas Andrew, o i la'ua sa tauavea lea pitola'au taua.

A manatu i le taimi sa faia ai la la galuega e lei faigofie. Faata'ita'iga, le pu'eina o ata o le afa tele 1889, ae le ta'ua le faigata o ala o femalagaiga i na taimi.

O ata iloga a Andrew e iai lona o Lauaki Namulauulu Mamoe le failauga, le pa o le mauga o Matavanu, ma isi. O na a Tattersall e iai va'aiga o le 1889, i le taulaga manua a malo e tolu i Apia, le iuga o le afa tele, ma le falelauasiga o Tupua Tamasese Lealofi le III. E te maua nisi o nei ata i le nofoaga tutotonu o Mataupu tau Samoa i le Laumua o le lunivesite Aoao a Samoa.

E leai se e tala'ole i le talafaasolo i pulega so'ona fai a malo mai fafo, ona o le manino a'ia'i o molimau a ata sa pu'eina e i la'ua.

E faapena foi le sao o Misi Parate, e fai ma sui o Misi uma—LMS ma le Uesiliana, sa faisao i le atina'e o le tatou gagana.



Misi Parate o se faifeau talavou ma lona i le taumatau o se alii matua, 40 tausaga o galue i Samoa, galue foi i Niue ma isi motu na ia asia



Na maliu Andrew i le 1939, a o Tattersall poo Teleso, e pei ona faaigoa ai e Samoa, i le 1951 i Apia, i lona 85.

O Misi Parate na maliu i lona aiga i Sini, Ausetalia, i le taeao o se Aso Sa 'laofie ma manino', pei ona faamatala se ripoti, i le atoa ai o lona 77.



Alfred John Tattersall



Thomas Andrew

UILI FAU UPU

Saili tali o fesili o lo'o i lalo. Pule oe pe sipela i luma (clockwise) po'o tua (anticlockwise).

E sa le feosoosofa'i.

1. Tusi mai se uiga o le upu *sina* i le 1. Samoa 2. Igilisi:

2. Sa'ili ni upu se 5 e faai'u i le fasiupu *to*

3. Su'e se upu e 9 mata'itusi ma tusi sona fa'amatalaga:



4. Tusi uma upu/ fuiupu e ta'i 3-9 mata'itusi, ma o latou soa i le Igilisi (E faitau ai ma upu ta'ua i le 1, 2 & 3)

Lelei atoa = 12 upu


Lelei tele = 8 upu

Lelei = 6 upu

PASO I GAGANA E LUA /18

Faatumu i upu/igoa Peretania e soa tutusa (va'ai i le fgt.)

Fill crossword with English words/names



©LPSL TAVITA

Faalava ~ Across

1 Aso Gafua (6)

4 a'au (4)

8 Aso Fanau (Iesu) (4)



9 *tama pese* ma faitaga (6)

11 filemu (6)

12 ipu

mafolafola

telē ave ai

mea'ai (4)

14 sooupu: o

le mea lea, o lea (2)

15 iuni malo Europa (2)

16 matua i tausaga (3)

17 tutusa (4)

22 Se pese a le aupaese

Beatles, i se auala (5,4)

25 Roma (4)

26 e le fa'aaogaina (3)

Lalo ~ Down

1 Minisita (8)

2 nila su'isu'i (4)

3 e pei (2)

5 salutimu taavale (5)

6 faaipoipo (5)

7 sina moe puupuu (3)

10 Egelani (7)

12 tamatamaivae (3)

13 iloa ai se auala i se aai (3)

18 Paneta Venusi (5)

19 Leai (2)

20 'au (ta'alo) (4)

21 Fuafuaga, peleni (4)

23 Faalupega: Foma'i (2)

24 goa Eti (2)

API the Word Builder

Rules:

1. Build as many English words as possible, start with three letter words.
2. Every word you build must include the Alpha Letter (centre).
3. Each letter is used only once, including the Alpha Letter.
4. The class as individuals or groups can play this game. 1 point for one three letter word, 2 for four letter word, 3 for five, and so forth.



Three letter words

Four letter words

Five letter words

Six –seven letter words

ADDITIONAL ACTIVITY: Make a list of other words that are spelt without the Alpha Letter E.g. PEN


SUDOKU ~ TAALOGA I NUMERA

(sudoku.com)

9	2	6		1	5			
1		8	7	6	3	9		
3		7	9			1	6	5
		9					3	8
7						6		
			3	9	6			
	7						1	6
6	9	4				7		2
5		3	6			4		9

~ TAALOGA PASO SAMOA I LE GAGANA SAMOA ~ POTO LAUTELE ~

1. Faatumu le pusa i upu/igoa Samoa poo se tasi e faatonuina.
2. E maua le faailoga \$100 mo sē e mua’i faatumua le paso i lona sa’o atoatoa.
3. E leai se tasi na maua le faatulagaga sa’o o le paso lomiga 17.



Copyright LPSL Tavita 2023

FAALAVA ~ ACROSS

1. toe faalelei, fonofono (6)
4. se itumalo aiga sa Malietoā (9)
9. se laau fua mumu (6)
15. faamatala ai galuega o loo gasolo ai Samoa i fafo (11)
16. Pese: _ means too much talk (11)
17. Se suafa sa’o tama’ita’i a o se matai foi i Solosolo (3)
18. Tino: ivi e pipii i ai ivi ‘aso’aso (11)
24. Fuiupu: _ i luma (6)
25. se mea ua sese ai (4)
26. fufulu a’a o le masoā (2)
28. ta’u ai ni falelotu tetele (8)
32. Taaloga: se fasi laau e lia’i (3)
33. Talatuu: O le a na fuli e Tuna ma Fata ma fe’e i Safotu? (3)
35. Igoa a’oga faafaife’au EFKS (5)
36. kiki (2)
37. Faama’i o lauulu o tamaiti (3)

38. So’ona ‘ote i se tamaitiiti (2)
40. Igoa o se fautasi mai Manono (9)
41. Talatuu: O le a na tupu ia Salevao ina ua taavavale ulupo’o? (2)
42. Faamasinoga Maualuga: suafa matai o se faamasino sinia: Clarence Nelson (3)
43. Upu o lauga: taotoga o tuugamau (6)
44. Upu masani: O le _ i aso uma (2)
46. tafao vale (3)
47. tofu le faasoā (2)
49. Itula o le aso ua te’a atu (8)
50. Vaolia Samoa: E le mau le _ (3)
52. Vaolia Samoa: Ua _ le pologa (2)
54. Mea tau su’esu’ega: Se auala e ao ai faamatalaga (7)
57. Atu Samoa: se motu sasa’e mamao (3)
59. Vaolia Samoa: sau i le _ (2)
60. TV: Polokalame o le lotu Samoa aoao (7,4)
61. Leo sa’o: Sau i le oge/ one (3)

62. Ta’u puupuū o le Alefapeta Samoa (2)
64. Upu o ‘ava: Ua _ vai ae suamalie ‘ava (3)
67. O fuiupu e tautu i ai se Gagana poo se nuu e fa’aaogaina (6)
71. Suafa o se faifeau sa galue i Apia: _ Naseri (6)
72. se ‘ula taatele i alii (7)
76. igoa o se aitu Samoa ta’uta’ua (4)
77. Kalama: si’upu iloa ai se nauna (2)
78. meatotino a se kamupani (5)
81. Fale’aiga numera tasi i Apia mo Samoa aso uma (6)
84. mafatia tele (7)
90. meafaigaluega ta tatau (2)
91. Taimi: faailo le tuana’i (2)
92. Alalafaga tua’oi ma Satuiatua (8)
93. Ma isi ua le ta’ua i le saunoaga (6)
94. Talatuu: _ Tuna ma Fata (7)
95. Laofie ma lagilelei le aso (2)
96. Tusi Paia: upu fafine e le fanau (2)
97. feala mai i le taeao (6)
98. Tu le la ae a le logo? (2)
99. Selu le lauulu pei ni galugalulu (5)
102. Igoa o se kamupani pasi (7)
104. se fofo o le ma’i (3)
105. igoa o se i’a (3)
106. o le faa-Samoa o le ‘hundredweight’ 100 pauna Amerika, ae 112 Peretania (9)
107. Afioaga o le ao Gatoaitetele (5)
108. Tala a tamaiti: Le alii e 40 lana vaega gaoi (7)

LALO ~ DOWN

1. Aganuu: o e leoina se tupu (5)
2. se la’au e ‘aina ona fua (5)
3. Manu Samoa tuai: Sene ? (5)



PASO SAMOA TAALOGA MAUA LE TAU TUPE \$100


5. 'Ava fai i le sua o le vine (5)
6. Taa: Se 'a'upega mata'utia (5)
7. Se alalafaga i Falealili (6)
8. Se meaola i vaega fetolofi (7)
10. Tusi Paia: le ala ta'uta'ua na auai Iesu Toe Tu ma ni ona soo ae le iloa o ia (4)
11. Faauma le upu: E au le _ (7,1,4)
12. O le ala e faatino ai le fe'au (6)
13. Alagaupu: Ua _ tupe i le fafao (4)
14. Tala a tamaiti: o se tagata tino ese (5)
19. Faia'oga/tusitala a o soifua: Unasa Leulu Felise _ (3)
20. sauni atu i se faamoemoe (3)
21. pa'epa'e (se isi upu) (3)
22. Se suafa matai i Lano (3)
23. Taunuu le vaa ma taula (4)
26. se isi ta'u o le solofanua Tusi Paia (6)
27. upuia se tagata (se isi upu) (10)
28. Se kolisi i Faasaleleaga (4,2,4)
28. Galuega a Iesu i e o le iloa (6)
30. upu o lauga: Tatou _ ia i lou finagalo (4,1,4)
31. Faa-Samoa le Lano's challenge (3,1,4)
33. te'a atu (5)
34. lofia se nuu e se matagi (4)
36. Pese/Tusi: i talaatu o _ (3)
39. galuega fai o le aso (8)
45. igoa o se la'au faivai (2)
48. ua gata ai vevesi o taua (3)
51. Aganuu: se malaefono Satupaitea (7)
53. Anava NUS: Ia a Samoa? (2)
55. Tusi Paia: Ioane 3. E _ le matagi i le mea e loto i ai (3)
56. Tusi Paia: Mareko 2.22. E le _ le uaina fou i fagupa'u tuai (6)
58. lagona masalosalo tamalaoa (3)
63. ave ese ma'a mai talo vela (2)
64. Se suafa lausilafia pisinisi Samoa: _ Westerlund (4)
65. Upu a Sagato Paulo: Ua _ ia te a'u le tausinioga (2)
66. tamaoiga (se isi upu tutusa) (2)
68. Faatonuga: i a'oga siva (3)
69. to'alua o le tamalaoa (3)
70. Ua sili atu i le taimi faigaluega (3)
73. se laau mumu ona fatu (3)
74. upu fou: sa'o, tonu (3)
75. Ta'u a Hawaii i le 'ula fugalaau (3)
79. Se suafa ta tatau lauiloa (7)
80. Pese Penina o Tiafau: La'u tifa i moana, la'u _ le fili o tama (7)
81. Ua lelei se fua mo le taumafa (4)
82. Se measina Samoa—faatinoga (5)
83. o se finagalo fa'aali (5)
84. se alalafaga tuuta Salafai (7)
85. galulolo (iloga foi i le sunami) (7)
86. O Samoa e le o se nuu _ (7)
87. Faafeagai o Auamanu (7)
88. le aso ua aga'i ina vevela (6)
89. Talatuu: se tasi atalii o Pili (3)
95. maua pea le malosi e faauma ai se fe'au, pe fai se isi fe'au (4)
99. Talafaasolo: Se tasi Malietoa (3)
100. Lakapi 7: ta'u ai se malae o se nuu e faasolo ai le taamilosaga (3)
101. Suinauna Peresona: O a'u, O oe, _ (1,2)
103. Aisea ua tulei ai le taavale? (2)

Galuea'iina o le Paso


O ni ta'iala nei e fesoasoani i le galuea'iina o le tatou Taaloga Paso:

1. Muamua, e fesoasoani le iai o sau tusiupu (dictionary) Samoa ma le Igilisi fo'i. E lelei foi ona lata ane lau Tusi Paia Samoa ona e iai ni isi fesili e faatatau tonu i ai. A iai foi sau komepiuta e lelei foi aua le sailiga o tali o fesili o le poto salalau.
2. O le tele o isi fesili e tali i lou poto lautele i mataupu o le a'oga ae faapea le soifuaga masani. E iai fesili e faatatau i le aganuu ma le si'osi'omaga faalenuu e mafai ona fesili i matua poo le faia'oga fo'i.
3. Taumafai e tali muamua fesili faigofie poo na e te iloa tali. Matau lelei le aofa'i o mata'itusi o se upu e te iloa i le numera lena e puipui atu. Sipela lau upu pe fetai ma le numera ona faato'a tusi lea i lalo. Manatua e le tasi se tali e fetai. Ft. Fesili, O le a le soa o le Igilisi Rain, e le tasi se tatou upu—timu, ua, uaga, uato, ae sa'o le "ua" 'ona e fetai ma le numera o loo tusi atu (2).
4. E leai se tulafono i le fea e amata ai, poo le faalava poo le tusa'o (lalo), e pule lava oe.
5. O nisi taimi e feavea'i upu ona e tasi le numera, faalava le tasi ae tusa'o le isi, e lelei ona siaki mae'a poo sa'o le numera ma lona ta'otoga poo le faatulagaga.
6. O tusiupu a Milner, Allardice ma lena a Pratt e fesoasoani tele. Iai foi tusi a le Evaleon Books—ESOL English-Samoan Book 1 & 2 e fesoasoani fo'i.
7. E lelei ona fa'aaoga se penitala e fai se titina e faigofie ai ona toe faasa'o se upu pe sui fo'i. Fa'aaoga foi isi tagata e pei o matua, faia'oga, matai, poo se poto faapitoa, e te fesili i ai mo se fesoasoani.



TALI PASO SAMOA LOMIGA 17



TALI PASO 17—LUA GAGANA



©LPSL Tavita 2023



Fa'aaogaga o le Paso o se auala e faamalosi ai le Literasi

Ua fa'amaonia i su'esu'ega itu lelei o le Paso o se auala e faaleleia ai le sipela, faitau ma le tusitusi a fanau. Talu ai o se taaloga, o lea e faamalosi ai le naunau e galuea'iina. O lena sailiga e taula'i uma i le mafafau ma faapea ona saga faaleleia ai lona atina'e. Ua iloa i su'esu'ega faavaomalo, e iai lena a Patrick, et al 2018, lona aoga i fanau a'oga o loo fia avea ma foma'i i falema'i, aemaise i le faa-masani i upu faigata o le faiva faafoma'i. Ma isi foi su'esu'ega e faatatau i isi faiva. E sili se 20 ni tomai taugagana e mafai ona atia'e i le Paso e aofia ai tomai su'esu'e i upu ma faamatalaga ma le vaogagana o mataupu eseese ma sionara o tusitusiga.

O LE TALA: SI'I MAI I LE TUSI—O LE GALULOLO, SAUNIA E LEUA LATAI

O LE ASO FAANOANO

Tusia le tala e Sina Felise
Aleipata Secondary School



Ata: Google Image

LOSO LE LA ma goto atu, ae le galo ia te a'u le aso lea na tupu ai le faalavelave.

E tupu le faalavelave ae matou te oo tonu lava i luma o le matou fale'oga. Ae matou faalogoina le galulu o le mafui'e, e lei umi lava ae matou vaaia loa le galu.

Matou te taufetuli atu, ae taina loa matou e le galu muamua, ou te tepa atu i tua ae ou vaaia le taufai tagi ma le laue mai o tagata i matou tua ma o mai ma le atoa, ua ou alu ma tapatapa nai o'u tei na matou o atu.

O le galu muamua lea na ou sao mai ai, ma sa ou pipii loa i le ogalaau, ma sa ou faapea ona ou pipii mai ai pea. Ou te taupeupe ina ne'i ou le toe vaai i le matou aiga faapea ma isi tagata o lo matou nuu.

Pe a ma le 30 minute o o'u taupeupe i luga o le ogalaau lea sa ou pipii ai, ae ou faalogoina loa se si'uleo o loo sau mai tai, e faapea e fia ola.

Pagā lea, e leai se mea ta te mafaia.

Ua ou va'aia le susulu pea o le la faatasi ai ma le sami.

Ua matou palapalā uma faapea ai ma fale malepelepe ma e o'o mai i le fale ua matuā leaga uma talu ai le sunami.

Ou te savalivali atu ou te agai atu i luma o fale o isi aiga, ua matuā faaleagaina uma o faleoloa, fale papalagi, o taavale ua matuā leaga uma.

Ou te o'o atu i luma o le fale o le isi aiga o loo fai mai le laue, e foliga ua feoti foi nisi tagata.

Ua ou vaaia ma le faanoanoa i lo'u loto ma lo'u agaga atoa i le mea ua o'o i ai le nuu leni.

Talofa e i nai tagata ma nuu faapea ma nai tagata ua faaumatia uma, ma a latou mea aogā ua

faaleagaina.

E le faagaloina ia te a'u leni mea talu ai le aso 29 Setema, 2009, e le mafai ona faagaloina ia te a'u, ma tagata o lo'u aiga.

**Ua ou va'aia
ma le
fa'anoanoa i
lo'u loto ma
lo'u agaga
atoa i le mea
ua o'o i ai le
nu'u leni.**

SOLO

Tavu'i Dr Niusila Faamanatu-Eteuati

E tautala aso!

E leai se mea e maua ma le fifilemu
Se'i vagana ua tigaina ma le lagona le
mamafatū
Ae le tioa foi ona sa'afi le faisalamo i le
tusi sa
E leai so'u fiafia e sili atu nai lo lena
Ia avea outou ma sulu e mumu atu i le
pogisa
E a'e fua se faiva pe a aunoa ma se sili'aga
i le tamā
Ui ina timu'ia, laina e a'oa'oina pea le ola
filigā.

Aso o le pologa ma le ausage o aiga i tuā
E te tautua faataule'ale'a vaeane o oe o le
feagaiga sa
O le i'uleo lava lea 'Se e au le inailau a tinā'
Poo le aiga teine, e tu malosi i taimi o faigata
Anusa foi, ua ta fiu i mā i le va'aiga a tagata
Sole pei ni afakasi ae a migoi mai fe'au
faatama eseese la legā'
Sau ai lava, sau ai lava, auoi ua kala le va.
Ai o le olaga finafinau lea sa totō e nai tua'ā
Ia iloa ua mau'a ma lē maluelue gofie i
vaitau o afā
O afā fulifaō ma matagi vale o le folauga o
faia nei
Suiga o le olaga, suiga o le tau, tumau pea
lou lalelei
Tainane le fesiligia o ou nafa tausī faaleaiga
ma nuu
I le saofa'iga a matai, i ekalesia poo upu fai
a le atunuu
Tapena faafafine to'aga, ou tofi ua mau ona
'u'u.

O mafaufauga o le loto e tupu pea ua pei se
ata faasolo
Ui ua sui faiga, ua sosofa pa, ae tumau pea
faavae i le loto
Ua fa'aogaina foi oe e te auauna, tautua ma
le alofa auā lona finagalo
Le igoaipu o si o'u tua'ā i Satupa'itea
'E tautala aso!'
Aua foi e fua mai galuega ma ou faiva
Alofilima sa e gapatia ai
Le viiga ia faafo'i atu pea i le e ou le poto ma
le atamai.
Pe faaletonu le itupa o tamā e mafai ona
si'itia a'e e le faamatai
Tama'ita'i Samoa, amiosolia, sa'ilimalo ma
lau peni lava ia ma'ai.

Dedicated to Women and Equity in Education

MAI LE TUSI—TALANOA FOGAFALA ACROSS THE MOANA

SE TASI O PEPA O LE MEASINA LONA IVA A SAMOA 2023: TIAKONO, PUA IELOME AH TONG, MATUAOFAIVA MATAUPU TAU SAMOA NUS

E lua tuugamau na mavaea'ina ai tapua'iga a Samoa



OTOOTOGA.

E le o se mea na fa'avae fua Malumalu tapua'i o Samoa, ae na afua o le i'uleo ma le vala'au a le tuugamau.

O le perofetaga a le tu'ugamau nai Ierusalem ma le mavaea a le tuugamau nai Fiti ua tasi ai Samoa i le tapuaiga faaleaganuu ma le tapuaiga faakerisiano.

I lenei saililiga ua mautinoa ai e le mafai ona atoa li'o lanu o le talalelei pe a le su'esu'eina faatasi ma le aganuu. E le mafai foi ona atoa usu taeao o le aganu'u pe a le su'esu'eina faatasi ma le fa'akerisiano.

O i lea e afua ai ona taofi Kamu (2008, p. 2) i le alagataua ona suesue faatasi uma vaega nei e lua ae le mafai ona suesueina ua nao se vaega se tasi. Aua a tala le gafa o le aganuu e fesaua'i ma le talalelei, ae a faausu foi le gafa o le talalelei e fesaua'i foi ma le aganuu.

O le tapua'iga i le aganu'u ma le tapua'iga i le talalelei, na fa'atoa atoa tino ai Samoa ina ua faasua lana tanoa ava ae faaulufale ona malu-malu tapuai.

FAATOMUAGA.

O le fesili tomua e ta'iala ai le sailiga e fa'apea, o le a le tu'ugamau?

Ua lau silafia e le to'atele, o le upu tu'ugamau i lona afuaga e fausia mai i ni upu se tolu, o le upu tu'u o le upu galue, o le upu tu'u-ga, ua fai ma nauna ma le upu mau o le soanauna. O le tu'uga o se nauna e fa'asino lea i le teuina lea o se mea faitino I se nofoaga mau ma le upu mau o le soanauna o lona uiga o le mau-sali, mau'a ma tumau le teuina o lea mea i lea nofoaga.

I le tu'u fa'atasiga la o upu nei e tolu, o lona uiga o se mea ua tu'uina atu i se nofoaga e tumau e le toe suia.

E le toe fesiligia la le uiga ta'atele ua masani ai i le tu'ugamau aua ua silafia uma lava o le fanua tanu lea ua teu ai le tino maliu e le toe aveesea se'i vagana ua liutofaga i se taimi mulimuli ane. O lea fo'i e fa'amatalaina e Pratt (1893, p. 324) o le upu tu'ugamau ma lona uiga, o se nofoaga fa'apitoa mo le tagata oti. O lo'o o gatusa ai fo'i ma le fa'amatalaina e Milner (1966, p. 291) le uiga lava lea o le upu tu'ugamau o se nofoaga mo le tino maliu.

Ua atili fa'amausaliina ai pea le uiga masani

ma le fa'avae lava lea o le tu'ugamau e ese mai i isi uiga na maua mulimuli ane i lenei galuega sailiili.

A o le tasi nei o uiga maotua ina ua toe talatala pea ma su'esu'e atili i upu lava ia o le tu'u poo le tuuga ma le mau. O le tasi nei o uiga loloto o nei upu, o le tu'uga e fa'asino foi lea I se inati po'o se fa'aaloalo a se tasi na te'a mai i se potopotoga



po'o ni faiga mea a le nu'u po'o se isi lava fa'alavelave. O se fa'aaloalo ua to ma te'a motu mai mo se tasi e avea ma ana mea totino. E tele ina o tatou fa'alogu fa'apea, o le inati lea a le toeaina na maua mai i le fonu a le nu'u.

O le tu'uga lea a le toeaina na momoli mai i mea fai a le aiga potopoto, o lona uiga o se fa'aaloalo ua faamatu'u motu mai ma e le toe pule ma aia i ai se tasi.

Ae o le isi uiga loloto o le mau e fa'asino lea i le tofa a tamali'i ma le moe i faleupolu. E faasino i le silafia ma agavaa iloga o se tasi e uiga i le tofa-manino a Samoa.

O le fesili, o fea la e afua ma fafaga mai ai le mau lea?

O le talitonuga o Samoa o le taimi e tofa ai le ali'i ma ona faleupolu o le taimi foi lea e utu ma fatufatu ai lana mau e ala i maui ma le mau lea ua taoto mai i le tuugamau o tuua ma aiga. O le ala lea e fa'aigoa ai le tofa a le tamali'i o le auafa mau, ae fa'aigoa le fa'autautaga a le faleupolu o le fetalaiga mau aua o mau uma na musuia ma ifo mai i le tuugamau.

O le mau na tausi ma fofoa mai e le maui ma le mau o loo ta'ui i le tuuga ma le fanua to. O i la ua

avea ai loa le mau ma nauna aua o le tofa, moe, agavaa, taleni ma se silafia tulaga ese o loo fa'a-agava'aina ai se tagata.

I le fa'atusaina la i le tu'ugamau o le tagata ua tu'uina ma teu ai, o lona tu'uga lea po'o lona inati lea e fa'avavau o le fanua ma le eleele ua teuina ai. O lona uiga o le mea e patino lava ia te ia ma o lona lava lea fanua ma lona si'o-si'omaga tumau. O lona inati eleele lea ua fai ma palapala malo, o lona tuuga tau fanua lea ua te'a mai e le sa'o ma le aiga e teu ai lana mau.

O le mau lava lea e tuu-faasolo i totonu o le aiga i le fia ma fia o auga-tupulaga. Aua e taoto ma lago le mau i le tuugamau lea e maua ai le upu tuugamau ae e toe tapena foi e le mau lava lea sulii ma feoi o loo soifua ma feola a'e i totonu o le aiga aua le mau tuufaasolo.

E pule le sa'o o le aiga i le fasi eleele e eli ai le tu'ugamau o se tasi o lona auaga pe a maliu aua e le mafai ona tu'u sa'olotoina fanua o le aiga e teu ai so'o se tagata o le aiga pe a maliu se'i vagana o le ioega a le matai o lo'o tausia le aiga.

Ae a tu'umalo foi le sa'o o le aiga e le fesiligia le nofoaga e teu ai, o le tulaga maota lava e eli ai lona fanua maliu e lagomau ai po'o se fanua o lo'o tao'oto ai ali'i sa'o uma o le aiga. Ae se'i vagana ua mavae ane le sa'o po'o se isi fo'i tagata taualoa a'o lei maliu i se isi nofoaga e fia taoto ai e ese mai i le tulaga maota o le aiga.

Silasila foi atonu o le ala foi lea na nanau ai lava le ali'i tusitala lauiloa o Ropati Lui Sitiveni-sone ina ia eli lona tu'ugamau i le tumutumu o le mauga o Vaea lea o lo'o taoto ai pea e o'o mai i le aso. O lona taofi o lona tu'ugamau o se lagi soifua lea e na te pua'ina pea le nanamu ma le pele o Samoa ia te ia.

E avea foi lona tu'ugamau ma pine o feagaiga o lona loto atoatoa ia Samoa e afifi ai lana mau. O isi o aiga e fausia Tia tetele poo se Loa maliu e tanu ai le Sa'o o le aiga o se fa'ailoilo o lo latou fa'aaloologia o le matai sa tausia le aiga. Ua le gata i lea ae ona o le mau o lo'o teu ma taoto ai i le tu'ugamau po'o le eleele na fa'ainati ma fa'atu'uga ai le tagata ua maliu.

O lona foi Tia tele poo se Loa e fausia lelei e teu faasolosolo i ai matai sa'o o aiga o se faailoilo o le mau ia teu malu o aiga.

Fa'aaau i le isi itulau

SE TASI O PEPA O LE MEASINA LONA IVA A SAMOA 2023: TIAKONO, PUA IELOME AH TONG, MATUAOFAIVA MATAUPU TAU SAMOA NUS

UIGA & FOLIGA TUAI O LE TUUGAMAU.

O aso anamua sa atualala tagata o isi aiga o Samoa fa'apei ona ta'ua e Tupua (1996, p. 190) e i ai le afioaga o Amaile i Atua ma Safotulafai i Savai'i.

O lagona o nei aiga pei sa lilifa lava i le ola fa'aletino ina ia vaai pea i foliga o le tagata e manatua ai pea ae sa le'i mamafa le silasila i le mau o le vaega e ola pea, e ola pea lava lea e ala ai ona gagana ma ola le tu'ugamau.

Sa taula'i lava le vaai ua na'o se nofoaga o le oti, ua na'o se fanua ua leai se fa'amoemoe o se ola, ae galo nimo ai o le fanua ma le eleele e gagana, o le nofoaga o loo ta'ui ai le ola poo le mau.

Ae ua iai foi suiga o lenei vaitau ma le talu-talu fou, ua avea le lima vaivai ma ausage o aiga ma faapogai ua ama ai i le taua o le tuugamau o le nofoaga e teu ma lagona ai le mau faapei ona iai i lenei saililiga.

O le toatele ua faaliu efuefu tino maliu o latou aiga ua maliliu e oo lava i nisi o alii taua o nuu ma afioaga ona o le taugofie ma le faigofie. Ae ua matua galo nimo ai le tamali'iaga ma le taua o le tu'ugamau o le inati ma le tuuga e teu ma taoto lagona ai le mau.

Ua aafia ai le tasi o aganuu masani a Samoa o le Liutofaga, aua a liutofaga e toe faataele ma u'u ivi o le tagata e ana le mau. Ae paga ua ama i le taua o le tuugamau o se nofoaga e ola a o se afeafe o fesufia'iga.

O nisi ua avatu le lefulefu o se tamalii taua ua teu i se tama'i fasi eleele ae ua leai se tuugamau tele e iloa ai e tagata le fanua to ma le eleele poo lona tuuga ua faainati e lagona ma faataoto ai lana mau, lea e maua ai le upu lagomau.

Aua o se luma pe a fai e avatu si tamai lefulefu i se tamai atigi pusa ua tanu ae fausia ai se tuugamau tele poo se tia foi. E le na o le talutalu fou foi ua iai lagona i le le faatauaina o le tu'uga e lagona ai le mau ae faapena foi nisi o tagata iloga anamua faapei ona taua e Taiao Dr Matiu Tautunu i le vasega o le HSA 500 vaitu'uaga 1, 2022 e fa'apea, e iai le mavaega na faia e se tasi o ali'i taua o se afioaga i Atua ina o le a lata ina tu'umalo e fa'apea, "Aua nei faia so'u tu'ugamau ne'i fefefe a outou fanau."

O lona uiga o lo'o atagia mai ai pea o lo'o pito tasi pea le vaai i le uiga masani o le tu'ugamau ua na'o se nofoaga e lafoa'i ai le tino oti, ae galo ai le uiga maotua ma le taua o le tu'ugamau lea ua puaina mai i lenei saililiga o se nofoaga e taoto ma lagona ai le mau.

E faapena foi le tupu o Salamasina sa ia faapea ane "afai ou te oti ia aua nei faia sou

tu'ugamau ne'i maua mai a'u e lo'u tuagane ona eli lea o a'u ma toe ave i Leulumoega, ae ia tanu lava a'u i le valusaga".

Sa lei manatu ma faataua i le tupu le tu'ugamau o se nofoaga e teu ma lagona ai le mau ae na taula'i ua na o se nofoaga lava mo le tino maliu. O le ala tonu lea sa lei fa'atino ai le poloaiga ina ua tu'umalo aua na fausia lelei le tuugamau o Salamasina o loo taua e Henry (1958, p. 83) e faapea sa ati lelei le tia o Salamasina ma fa'afogatia tolu, ae teteu ma faamanaia i 'amu ma iliili papa'e mai Salani.

Ae peita'i na ta'ua e le tasi Patele Katoliko e suafa ia Mauola Leilua Kelemete sa galue ai i Lotofaga i le tele o tausaga ua mavae e faapea, "E leai ma se tuugamau fogatia tolu o Salamasina o i ai i Lotofaga i le taimi nei faapei ona taua i tusitusiga a Henry F. 1958".

O aso ia a teu le maliu i le tu'ugamau ua na'o le eli lava o le fanua aumai ma lapa i le sami ua fau ma ufi ai le tu'ugamau ma afifi i le siapo poo se fala le tino maliu ona lafoa'i ai lea.

O isi o maliu ua na'o le eli lava o le fanua tanu afifi i se fala lili'i le tino maliu ona lafoa'i lea i lalo ona asu loa lea iai ma le palapala e aunoa ma se isi lava mea e tau teuteuina ai.

E faapena foi faamaumauga i taimi o le faama'i tele o le 1918 lea na aumaia e le vaa o le Talume. Sa anoanoa'i tagata maliliu ma sa tau ina tanu ma lafoa'i tino maliliu i ni lua tetele ae ua ama i le tamaliaga ma le mau lea e afifi ai.

E tatou te molimauina pea lea mafauaiga i ona po nei pe a oo ina teu ni maliu i le toatele o tagata e oo lava i nisi o le aufai-lotu e faapea "O lea ua lafoa'i le tino maliu." O se gagana ta'u-faatauvaaina le mau ma lona tu'uga.

UIGA MA FOLIGA FOU O LE TUUGAMAU.

Ua mautinoa nei ua le na'o se nofoaga e tu'uina i ai le tino maliu ae o se nofoaga e mamana ma mamala ona o lo'o teu ufi ai upu o mavaega, o lo'o tasi ai feagaiga tu'ugaliga i mau o tagata oti. O le nofoaga o faaleleiga ma fa'asoaga ae o se malaefono foi o talatalaga. O talatalaga e susu'i ai avei ma asoa ua momotu ona o le soli tapu. O le fanua e gagana ona o le mau o le tagata o lo'o taoto ai, aua e ala ona 'ote ma sau le tagata o loo taoto i le tu'ugamau ina ua tu'umavaega ma soli tapu le tagata soifua.

O lo'o molimau ai Aumua (2007, p.19) i lana tusi ua fa'aigoaina "O le tautua fia matai e fa'amaga ai le eleele." O lona uiga o lo'o fa'amasino mai le tu'ugamau o e ua maliliu i galuega ma fa'aiuga fai a tagata o lo'o feola, a lelei e tua i manuia a leaga e tua i malaia. O le ala foi lea a

sese ona filifili sulii e matai ma tausia se aiga e seasea ona umi se nofoaiga. Aua fo'i o lo'o autilo mai le tu'ugamau, o loo va'ava'ai mai mau o tua'a ua tao'oto mai i tu'ugamau ma le le malilie i le filifiliga.

E ese le malosi o lenei fo'i talitonuga i aiga o Samoa, aemaise lava suafa ma eleele e fa'apele-pele ma fa'amemelo ai aiga ma sulii. E le tau fesiligia le to'atele o nisi ua maliliu talavou e afua mai o suafa matai ua sese tofiga. O le to'atele e malolosi ma soifua maloloina ae filifili loa ma tofi e se'ei mai i se suafa maua luga e tausia le aiga, o i'ina e amata ai loa ona fa'atupu ma'i seia o'o lava ina maliliu pe a fai e le'o malilie iai tua'a ua tao'oto mai tu'ugamau.

O le isi na o pine e iloa ai o lo'o mamalu mai le tu'ugamau ma lona mau, o lo'o tasi ma apo pea e mau o tua'a ua maliliu le aiga ma ana measina tu'ufaasolosolo ina ia malu pea le Fa. E le na'o le tagata ola fo'i e tu'u mavaega ma soli tapu o feagaiga. E fa'apena foi le tu'ugamau, lea e iai le mau e faapea, a sese le tu'ugamau e ta'a ma fa'asoesa le aitu, Fonoti (2011, p. 23) e fa'apea, o le isi lea fa'apogai o le ma'i aitu o tagata o le aiga ona o lo'o vili tiga le aitu e fia fo'i i lona aiga ae ua sese le fanua ma le tu'ugamau o lo'o tanu ai. O lona uiga e le na'o le tagata ola e sese, e leai, e sese foi le tu'ugamau aua o le ala lea o le fa'asoesa ma fa'atalutalu le aitu po'o le mau ina ua le fiafia i lona tu'ugamau.

O le tu'ugamau o se malae o talotaloga, a'o se tupua foi o velevelega e fa'afaletui ai sulii ma gafa o aiga, o le paepae o talatalaga e fesufia'i ai le tagata ola ma mau o e ua maliliu.

E i ai le taimi e talanoa ai le tagata ola ma le mau o le tagata oti lea e afua ai ona fa'aigoa le isi fono a Samoa o le fono ma aitu faapei ona taua lea fono e Tagaloa, 2003 (p. 43). O se nofoaga e fa'asufi ma fa'aoleole ai le mau o le tagata oti pe a tutupu ni mala i le aiga. O se nofoaga e fa'asifo ai aiga ina ia ola le sala ae magalo ona sulii, fa'apei ona taua e Kamu (2008, p. 21) e faapea, e mafai ona avea aitu po'o agaga o tua'a ma sulufaiga i aiga i taimi o faigata.

O le tu'ugamau e togisala ma faaosaala pe a tu'u mavaega sulii i mavaega tasi ua augatupu-lagā. O le tu'ugamau e ola, o le tu'ugamau e fa'amasino ma matamata mai fa'apei ona taua e Aumua (2017, p. 6) o lo'o fa'apea mai "E tilotilo mai le tagata o lo'o taoto i le tu'ugamau i mea o lo'o faia i le taeao, aoauli ma le afi". O le isi lea mafua-aga o le talanoa ma le tu'ugamau pe a i ai se mea ua le malie ai le tagata o taoto ai, lea e taua foi e Aumua (2007, p. 73) e fa'apea, o lo'o molimauina ai le ulufia e le agaga o le temoni ma mau o aiga ona o le soli tapu.

SE TASI O PEPA O LE MEASINA LONA IVA A SAMOA 2023: TIAKONO, PUA IELOME AH TONG, MATUAOFAIVA MATAUPU TAU SAMOA NUS

O le ala lea a iai foi se mea e mana’o i ai le tagata ola ona alu lea ua talanoa ma tatalo i le tu’ugamau, faapei ona molimau ai Turner (1884, p.151) o lo’o faapea mai, e le fou lea mea o le talanoa ma tatalo i se tu’ugamau ae o le mea ua leva ona faia e Samoa mai anamua lava.

O le tasi foi lea o fa’apogai e lavevea ai tagata Samoa pe a soli ma fausiaina o latou fale nofo i luga o ni tu’ugamau leaga o fanua ma ona tapuafanua, ua le na’o ni tu’ugamau ma se nofoaga e lafoa’i ai le tagata oti, ae o le fanua e mamana ma mamala ona o le mau.

Atonu o le ala foi lea ua faaosofia ai le teu lelei o totonu, fa’asima ma fola i ma’a tioata ma ua vali fa’amatagofie atoa ai ma se Pusa maliu anagata ma taugata. Ua tapena o se nofoaga o se tagata soifua ae le’o toe tilotilo ua na’o se nofoaga e lafoa’i ai le tino maliu pau ai lea.

Ua o’o lava i totonu o nisi o fale o aiga ua fausia ai i totonu tu’ugamau, o le vaaiga lea ua atagia ai ua le’o toe vaai o se nofoaga e lafoa’i ai le tagata oti ae o se nofoaga e ola ma soifua le mau o lo’o nofo ai. Ua suia ma aveia ai le vaaiga lata mai i le tu’ugamau ma nofoaga taualoa ma le taua ona o le mau ma le mau o loo teu ma lago tumau ai. Le tioa foi ona faapea le saunoaga a Malietoa Tavita “Samoa o mamalu uma ma o tatou paia faatasi ai ma lo’u fala folaloea ma lo’u nofoa vaeveloloea, o le a ou alu ma a’u i le tuugamau. O le silasila a le Malietoa o le tuugamau o le nofoaga e mapu ma taualuga ai mea uma lava e oo lava i mamalu ma paia e afifi uma i le tuugamau.

O le tu’ugamau gagana, o le tuugamau e alofa, o le tuugamau e ita toe tasi mavaega. O le mau foi lea a Fonoti (2011, p. 20) i le tataua ona malie atoatoa le tagata oti i lona fanua ma lona tu’ugamau leaga e ta’a pe a sese le fanua tanu. Aisea? E le o le tagata e afua ai ae o le tu’ugamau le fa’apogai, aua e le mafai ona sola le aitu ae tia’i lona tuugamau, leaga ua uma ona tosi le faia ma osi le feagaiga ma le tu’ugamau o lona lea nofoaga tumau.

E le mafai ona alu le mau nofo i se isi tu’ugamau ae tia’i lona tino ivi ma lona tino maliu. Aisea? Leaga o lona lava lea nofoaga na tu’u ifo ai e taoto tumau ai e fa’avavau vagana ua liutofaga. O lona uiga, o le tu’ugamau ma le fanua ua fa’apaiaina mo le tagata oti ma lona mau, a’o le mau foi ma le tino oti ua fa’apaiaina mo le tu’ugamau ma le fanua.

Le tioa le fuaitau masani “Ua goto le va’a

ma le uta, ua alu i le tuugamau ma le mau, ae ta mai le efu o le fau i fanau.” O le mau lea ma le mau o loo nofo i totonu o lona tuuga ma le inati eleele ua toina ai.

Afai o se tasi foi o le aiga o loo mau paolo i se isi afioaga ae maliu ai, e iai le toga e tatala ai sa ma faaui tapu o le eleele ese o le a taoto ai, lea e ta’u o le le ufi eleele. O lona le e faaui ai sa ma tatala ai tapu o fanua, ae o loo tauai mai ai ma mau o le aiga e ana le tagata ua maliu e faatulou ma faamalie i mau o le aiga ona o le tagata ese o le a teu i o latou eleele sa.

O lona le ua totonu ai le faia ae osi ai le feagaiga a le tagata ma le eleele ua inati ma faatu’uga ai e le aiga o le fanua. O lenei le e ui magalo ai sa ma tapu o eleele i ona fanua ma tapuafanua. O se aganu’u o loo atagia ai le faaaloologia o le eleele ma le fanua ua to mai e fai ma tu’uga e taoto ma lago ai le mau.

TAPUA’IGA A SAMOA A’O LE’I MAVAEA’INA TUUGAMAU.

O le a le tapuaiga? O le tapuaiga ina ua matauina lagona faamauina faapei o le solo o le Va, o loo atagia ai le va tapui o le tagata ma lona atua faapei ona taua e Tagaloa (2003, p. 7) na fanau mai ai le lagona tapuai o le tagata. O i na afua ai tapuaiga ma talotaloga i atua mo se manuia o se tasi o le aiga poo le nuu ma le itumalo foi faapei ona molimau Tagaloa 2003 (p. 49).

O a ala o tapuaiga a Samoa a’o le’i taunu’u mai le talalelei fa’atasi ai ma le tanoa ava lea ua tapua’i ai nei Samoa i le aganu’u?

O le vaega muamua e lei atoa ma tasi se tapuaiga a Samoa, e le’i tasi foi se atua o Samoa anamua, e le’i tasi foi tu ma aga o tapua’iga anamua ona sa tapua’i fa’aletagata, tapua’i fa’aleaiga, tapua’i fa’alenu’u ma itumalo. E le’i iai se taimi ua tapua’i fa’atasi ai Samoa ua tasi i sona afeafe tatalo, e le’i tapua’i Samoa ua tasi lona atua tapua’i, ua tasi ana tu ma aga i tapua’iga ma tasi le loto, mafaufau ma le agaga tapua’i.

E mafua ona sa tapua’i le tagata i lona lava atua ua filifili ma talitonu i ai, sa tapua’i aiga i atua tasi o tua’a ua mavae sa fai ma atua tu’u fa’asolosolo o aiga, sa tapua’i nu’u ma itumalo i atua o vavau ma atua o taua.

Faapei o Nafanua o le atua fafine o taua sa tapua’i i ai ua na o nisi o itumalo ae sa lei saili uma i ai Samoa. E faapena foi Aana ma le Vaimauga sa tapua’i i le fe’e aua o lo latou lea atua o taua. E faapena foi Manono sa tapua’i i le matu’u, o le atua tau o Atua o le fetu o Tupualegase ia ma le anoanoa’i o atua eseese. O le ala lea o le le’i mafai ona atoa li’o Samoa i

le tapuaiga e tasi, atua e tasi ma le faatinoga e tasi anamua.

TAPUAIGA NA MAVAE MAI LE TUUGAMAU NA FOA I LE PAPA.

E lua la tu’ugamau taua na afua ai nei ona tasi le tapua’iga a Samoa.

O le tu’ugamau muamua o le tu’ugamau lea nai Ierusalem, lea na fa’apea ai upu na mavaea’ina “O mai ina o e fai nu’u uma ma so’o ma Papatiso atu i le suafa o le Tama ma le Alo ma le Agaga Paia”.

Le tu’ugamau lea na tu matila ai le laau, le Koluse lea o le manumalo lea na saili ai so’o ma aiga Kerisiano i le lalolagi ma Samoa nei. O le talalelei na valoia e Nafanua fa’apei ona molimau i ai Meleisea (1987, p.52) e fa’apea na valoia le talalelei e Nafanua e fa’apea o le a taunu’u mai le tala’iga fou i Samoa e fa’amuta le toe tapua’i i atua o Samoa. O lona uiga e le’o se mea na fatu fua le o’o mai o le talalelei, ae o le mavaega a le tu’ugamau nai Ierusalem lea ua tapua’i ai nei Samoa.

O le tu’ugamau e 2 o le tu’ugamau lea sa i Fiti na fa’apea ai foi upu na mavaea’ina, “O se laau e ola a’e i ulu o lo’u tu’ugamau ia o ma ave e saili ai o tatou aiga i Samoa”, o le Ava lea ua fesilafa’i ai nei le atunu’u lea e taua e Kramer (1901, p. 29), o le ava le laau na tupu ma ola a’e i le tu’ugamau i Fiti. O le laau lea na feausi mai vasa e saili ai aiga ma ua potopoto ma tapua’i ai Samoa ma ona gafa. Le Ava lea ua potopoto ma toe feso’ota’i ai aiga lea ua tauave pea e o’o mai i ona po nei.

E tofu le tu’ugamau ma le laau na tu ai, e tofu le tu’ugamau ma le mavaega na mavae ai, e tasi le feau o le tapuaiga ia Samoa. O le tu’ugamau nai Ierusa-lemā na tu ai le Koluse lea na saili ai so’o o le talalelei lea ua o’o mai i Samoa. O le tu’ugamau lea ua fa’atasitasi ai Samoa i malumalu tapua’i.

O le tu’ugamau nai Ierusalem lea ua fusia ma tasi ai Samoa i le fa’aolataga ma le talalelei. O le tu’ugamau nai Ierusalem lea ua Papatiso ai Samoa i le Tasitolu Paia ma aveia ai ma tino e tasi ia Keriso. O le tu’ugamau na fa’afailēle mai ai le tapua’iga ua iai nei Samoa i le talalelei.

O le upu moni e leai se talalelei pe ana leai le tu’ugamau lea na mavaea’ina, e leai se talalelei pe ana leai se mavaega a le Ali’i Fa’aola, e leai ni lotu ma ni potopotoga a Ekalesia pe ana leai le tu’ugamau na tafa ai ata o le toetu manumalo o le Ali’i Fa’aola.

O le Koluse o le laau na feiloa’i ai Samoa ma fa’avae lana tapua’iga, o le laau ua fesilafa’i ai Samoa i malumalu tatalo, o le laau ua potopoto ai Samoa i le Talalelei a Iesu Keriso.

O le laau na eli ai fa’avae o malumalu, o le laau

SE TASI O PEPA O LE MEASINA LONA IVA A SAMOA 2023: TIAKONO, PUA IELOME AH TONG, MATUAOFAIVA MATAUPU TAU SAMOA NUS

na ta fesilafa'i ai Samoa ma le Atua soifua, o le laau ua tasi ai nei Samoa talalelei.

O se tasi foi o pine faamau o lenei tasiaga i tapuaiga o le fa'avae ai fo'i ma le saofaiga po'o le fono a Ekalesia so'ofaatasi i Samoa nei fa'apei ona molimau ai Vaai (1962 – 2012, p. 79) o lo'o taua ai le fa'avaeina o le fono a Ekalesia so'o faatasi i Samoa i le tausaga 1961. O se tasi o fa'ailoilo e saga tapu'e ai pea le potopoto o Samoa e afua mai i le mavaega a le tu'ugamau lava lea nai Ierusalem. O se tasi o pine fa'amau e fa'ailoa ai ua tasi Samoa i le Papatissoga, tasi i le Atua, tasi i le faaolataga.

Ua tasi ai nei Samoa i le Atua, ua tasi ai Samoa i le talalelei, ua tasi ai Samoa i le Tusi Paia ma le fa'aolataga. O le fatumanava atoa o le talalelei o puapuaga, maliu ma le toetu manumalo o lo tatou Ali'i fa'aola o Iesu Keriso. O le talalelei la ua tasi ai nei Samoa i le afuafu tapua'i e tasi i nu'u uma i malumalu tapua'i, aua e leai se nuu e fa'apaupau, e leai fo'i se nu'u e aunoa ma se malumalu tapua'i o fausia ai.

O nofoaga nei e tulaga ese lava i totonu o nu'u ma afioaga, e fai o le tetele ae o le matagofie ma taugata e o'o lava i maota o fa'afeagaiga. O iina e iloa ai ua tasi Samoa i le talalelei e ala i galuega nei ua tasi ai nuu ma afioaga, aua e le toe fesiligia po'o a uiga o nei fale. Ae ua iloa uma e so'o se tagata o nofoaga nei ua tasi ai nu'u o itumalo ma le atunu'u e o'o atu i le lalolagi tele.

O se isi o vaaiga e fa'amausali ai lenei taofi, o le fa'alogoina lea o logo e tata i so'o se nu'u ma so'o se afioaga o Samoa i le aso Sa. Ua le gata i Upolu ma Savai'i ae fa'apena ai fo'i Tutuila ma Manu'a, o le logo a le talalelei o le fa'ailoilo o le tapua'iga ma le fa'ailoga o le tasi ai o Samoa i lenei tapuaiga. Ua tasi Samoa i le talitonuga, ua tasi Samoa i le fa'atuatuga fa'a Kerisiano ua tasi fo'i i le Papatissoga, fa'apei ona mavaea'ina mai i le tu'ugamau o loo taua e le Tusi Paia Katoliko (2008, Mataio 28: 19) "O e fai nu'u uma lava ma so'o ma Papatissoga atu i le Suafa o le Tama ma le Alo ma le Agaga Paia."

TAPUAIGA NA MAVAE MAI LE TUUGAMAU NAI FITI MA LE ATU FAGA.

O le tu'ugamau nai Fiti na tu ai fo'i le laau lea na saili mai ai aiga, le ava lea na feiloa'i ai aiga o Samoa. Le ava lea ua alofisa ai le atunu'u, le ava lea ua patipatia i feiloa'iga ma fa'atasiga a Samoa.

Ua le gata ia Samoa lava ia ae ua tasi ai

Samoa ma atunu'u i fafo i lana aganu'u talimalo. Po'o fea lava se tafa o le lalolagi e malaga mai ai ni malo e tasi lava le laau e feiloa'i ma potopoto ai, o le ava o le ali'i taeao ma le usu fa'aaloalo lea na mavaea'ina mai le tu'ugamau.

O le aganu'u maualuga lava lea a Samoa, o le aganu'u mamalu ma le talimalo foi lea a Samoa. Po'o le a le faula'i o taumafa ma le matagofie o le tapenaga i ni taligamalo e le mafai ona atoa pe a leai se ava e patipatia ma talosia ai le potopotoga e ala i le ali'i taeao ma le usu fa'aaloalo po'o le tapua'iga lea faaleaganu'u.

E le aloaia ma mamalu potopotoga a Samoa pe a leai se agatonu e patipatia, e leai se uiga o le saofa'iga a le atunu'u pe afai e leai se agatonu e momoli ai le tapua'iga a le aganu'u. Aisea? Leaga o le agatonu e talosia ma tapua'ia ai faiva o le atunu'u, o le vao, sami ma le laufanua ma ona fa'atufugaga eseese fa'apea faiva ma ta'aloga.

O lea e ta'ua foi e Reupena (2016, p. 46) o le Lotu ma le tapuaiga lea a Samoa e momoli ma talosia ai Samoa ina ia apelepelea ona faiva aua feiloaiga ma fesilafaiga. O le agatonu o le tapua'iga lea a le Samoa e talosia ma faamanuia mai i ona laufanua ma le si'osi'omaga anamua a o le'i taunu'u le Atua o Misionare. O le ala lea a taumafa le sualofi e sa'asa'a muamua le sua ava ina ia aua ne'i afetualaina le potopotoga e ni mala ae ia soifua puipuia le fesilafaiga e le Atua o Samoa.

Ua avea le agatonu ma fatu ma fa'apogai ua aofa'i faatasi uma ai Samoa i le tino e tasi e oo lava i le lalolagi i fafo o le agaga o le loto gatasi, fetalitonua'i, feoeoea'i, fealofani, fefa'amaga-loa'i, fa'aleleiga, galulue faatasi o sulii uma o le tanoa ava.

Na taua foi i le fa'atalatalanoaga ma se tasi o tamā o le talalelei ma le aganu'u ua fai i lagi le folauga e suafa ia Tiakono Kasiano Leupepe na ia taua ai e faapea, e 11 vae o le tanoa ava a Samoa ona e 11 ona itumalo mavae. O lona uiga o le ava i le tanoa e atoa ai Samoa o le aiga e tasi ma le atunu'u ua potopoto fa'atasi faapei ona ta'ua e Reupena (2016, p. 45).

O le pine, e leai se nu'u e leai ni ana potopotoga fa'alemasina, lea e ta'u e isi nu'u o aso Gafua a le nu'u po'o fono fa'ale masina. O nei potopotoga uma po'o fonotaga fa'alemasina e le mafai ona usu fua pe fono e aunoa ma se tapuaiga e ala i se ositaulaga e fa'afetaia, fa'asifoatua ma talotaloga i le Atua ina ia to ni manu e ala atu i le ali'i taeao ma le usu fa'aaloalo.

Aisea? Leaga o le taulaga osiosi, o le tapua'iga fa'aleaganu'u e fa'aui ai sa ma tapu, o tapuaiga e fa'afao ai va'a o mala ae laga le va'a o manu. Ua tasi Samoa i le tanoa ava, o le ala lea e fa'alupu ai fanau tama uma a Samoa o aumaga, aua o latou

e maina le ava lea. Ua fa'alupu tasi foi i latou o taulele'a ona o latou e nafa ma le tatauina o le Le'a a matai uma o Samoa.

E le na'o se nuu poo se itumalo foi e fa'alagi fanau tama o ni aumaga ma taulele'a. E leai! O so'o se nu'u lava o Samoa, o le mea moni ua tasi ai nei Samoa atoa i aumaga ma taulele'a ma o le fa'ailoilo lea o le tasi o le atunu'u i le tapua'iga i le tanoa ava. O le isi lea pine e iloa ai le tasi o Samoa i le agatonu ma le ava sa lei masani ai le atunuu ona potopoto ma aofia fa'atasi se'i vagana ai nu'u i ana saofaiga fa'avae o ali'i ma faipule, aumaga fa'apea aualuma o nu'u fa'apei ona ta'ua e Fonoti (2011, p. 63) o loo faapea mai, o le ava o se fa'asoa mai le vavau ma o se igagato a le atunu'u na to mai i o latou atua ma tupuga anamua.

O lo'o lilifa lava nisi o taofi i le tasi o Samoa ona o ona gafa, gafa ia na saili mai i le vasa e ala i le laau lea nai le tu'ugamau i Fiti. O lea ua mautinoa nei le taofi fa'a tumua, ua ala ona to'afilemu ma utu le toto masa'a o Samoa ona ua tala gafa tumua ae toia ma sulua e ave o le malamalama.

O lo'o manino mai ai o Samoa ua feso'ota'i ma fesilafa'i ona o le gafa o le ava lea na saili mai ona aiga i Samoa ma le gafa o le Koluse lea na fa'aso'o ai Samoa i le talalelei. O le tapua'iga fa'aleaganu'u ua tasi ai nei Samoa. O le agatonu o le tapua'iga lea ua tasi ai Samoa atoa i le taimi e faatino ai. O le ava ua tasi ai Samoa, ua tasi ai aiga, tasi ai nu'u, itumalo ma le atunuu.

E le o se agaifanua po'o tu fa'a vaifanua ae o le aganu'u ma tu a le atunu'u ua taga tasi uma ai Samoa.

O le ata atoa o le tapua'iga a le talalelei lea fo'i e ata ai le tapua'iga a Samoa i lana agatonu faapei ona molimau i ai Reupena (2016, p. 46). E iai le Atua e momoli i ai le viiga, fa'afetai ma le fa'a-sifoga, e iai le ositaulaga e na te ta'ita'ia le tapua'iga, e iai le fata faitaulaga e lu'ilu'i ai le mea faitaulaga, e iai ona tapu e tausii ma ta'iala ai fa'apea malu-malu e osiosi ai le tapua'iga faapei ona taua e Tagaloa (2003, p.93) o le tapuaiga lea a le matai a Samoa.

A'o le'i taunu'u valoaga a le talalelei nai le tu'ugamau o Ierusalem ae ua loa ona tapua'i Samoa i atua eseese fa'apea fo'i le agatonu ma le tanoa ava ona o le tu'ugamau lea sa i Fiti.

E ui sa fa'alupelupe atua fa'anuu'upo o Samoa i le agatonu ae na liua atoa ma suia i le Atua o le talalelei ina ua to'ai taunu'u le Atua o le au Kerisiano e fa'ataunuu ai le tu'ugamau ma lana mavaega. Ua na ona sui lava o le tapua'iga i le Atua Soifua a le 'au Kerisiano, ae tumau pea lana 'anava o le tapuaiga osiosi faatasi.

Fa'aauau itulau mulimuli

E lua tungamau na mavaea'ina – P.I.L. AhTong

AOTELEGA

O tu'ugamau na ma'ape ai tofiga ina ua tofi le talalelei tofi ma le aganu'u o le a tapuvae tasi ai Samoa e ala i ana tapua'iga. E le'i fesilafa'i fua la le talalelei, e le'i fesilafa'i fua foi le aganu'u ae o le mavaeaga a le tu'ugamau.

O lea ua manino o le tu'ugamau na afua ai le tapua'iga a le au Kerisiano ma potopoto ai nei i malumalu tapua'i. O le tu'ugamau foi na afua ai ona potopoto Samoa i lana tapua'iga fa'aleaganu'u i le agatonu ma le tanoa ava a Samoa. E le o ni tapua'iga ma ni potopotoga na fa'aofi fua ae o tofiga mai anamua, o le ala lea e le mamalu ma aloaia potopotoga a Samoa pe a leai se tapua'iga a le talalelei.

E le mamalu foi ni feiloa'iga fa'aleaganuu pe a leai lana tapua'iga fa'aleaganu'u i le agatonu ma le ava taute e lufilufi ma tapua'i ai.

Ana leai se agatonu na mavaea'ina mai le tu'ugamau, e le ali'i taeao ma usu fa'aaloalo Samoa, ana leai fo'i se talalelei na valoia mai fo'i e le tu'ugamau, e le potopoto ma tapua'i faatasi Samoa.

Ua leva ona tapua'i Samoa anamua i ona atua a'o le'i taunu'u mai le talalelei faapea le ava ae peita'i sa le'i atoa li'o iai le atunu'u. Sa fa'atino ta'ito'atasi aua sa iai fo'i atua o tagata lava ia. Sa fa'atino fa'aleauaiga aua sa i ai fo'i atua o aiga, fa'apena fo'i le fa'alenu'u aua sa iai fo'i atua o nu'u e aofia ai fo'i ma itumalo.

Ae i lenei saililiga ua mautinoa ai 'ana le seanoa tu'ugamau ia e 2 e le mafai ona tasi le tapua'iga a Samoa atoa i le talalelei, e le mafai foi ona tasi le tapuaiga a Samoa aoao i lana aganu'u e ala i lana tanoa ava.



Talanoa Fogafala: Tataala ni tusi fou se lua



I le fonotaga a le OCIES na maua ai foi le avanoa e fetufa'i ai fatusolo, fatupese ma tusiata a le Pasefika i o latou tomai ma potomasani, i se pa'aga soofaatasi a le NUS ma le lunivesite o Aukilani.

O nei feiloa'iga o se fe'au faagasolo e lavea i sini ma faamoemoega a le Sosaiete. O se avanoa foi e faailoa atu ai taleni a le nuu o loo talimalo, atoa galuega ua mae'a ona lomina e faaopopo i le utu o fatua'iga Osiana.

I lenei la fonotaga, sa faaulufale ai se tusi o le igoa Talanoa Fogafala- Pacific Identities.

Atoa foi ni isi o lomiga saunia e taleni Pasefika, aofia ai le fanau ma susuga i faia'oga.

Sa faailoa ai foi ni isi o taleni i musika, le solo ma atatusi mo le taimi muamua.

O se tasi o tusi sa faaulufale o lena o le igoa Reflections of a Maestro, e faatatau i le alii tusiata ta'uta'ua sa galue i Samoa, Ernesto Coter, faaalia ai galuega a Leua Latai, Lalovai Peseta, Lealofi Toleafoa ma Pelenato Liufau, sa a'o'oga i le alii tusiata. Sa iloga le lagolagoina o lenei sauniga e sui o a'oga e lua—NUS ma Aukilani.

O nisi o faiga pa'aga a le NUS ma fatusolo Samoa e iai le tusi Tofa Sasa'a, o talafatu ma solo o loo fa'aaoga e a'oga, ae le o iloga le faaofia i totonu o isi sionara e iai pese, siva, fagogo ma tala faakoneseti faaonaponei, e fia atia'e foi.

Tulimau o Pola:

E mua pea le faafetai i le Tamā i le lagi, i lou soifua ma so'u malosi ua tatou toe fesilafa'i ai i lenei fo'i taeao manino. Malo le soifua maua.



E fa aso o le fono a le OCIES i le laumua i Le Papaigalagala, lea faato'a ta'ape atu i le manuia ma le loto faamalieina. E sosoo lava nei fonotaga tetele—mai le Measina na se'i mavae atu—ae o ni lelei mo Samoa ma le 'aarusufono e le tauilo. Mo a'u lava ia, e umi se taimi e auaua'i ai le ma'au ma le milosia.

O nisi o tofa sasa'a mai uso Osiana i le itulagi sisifo, pei o Fiti, Solomona, ma Papua Niu Kini, faapea foi Toga, sa ou fiafia lava i ai. Ona o le upu 'comparative' e tutotonu i le faasoa, sa ou fia manino atili ai i nisi o tu e eseese pe tutusa ai foi ma tatou. E iai le vaeveaga o fe'au, e amo ai e tina le mamafa i le fatuaiga tausii. Ia, ou te le iloa pe se mea faakolone poo se tu faapologa, ae a fai se faatusatusaga, e ese foi Samoa i lana tofa manino o le feagaiga. Pau a lea, e sa'o nisi o sui usufono, e talanoa ai, ae mana'omia ona ola ai, e pei o le fe'au a le Sulu o le Filemu, Taofi Sauaga, logoa ai Samoa vaiaso ua sola.

Maeu foi le sao o nai fanau talavou, e iai le alii o latua Felagai Taito, mai Aukilani, o lana faasoa o le va fealoa'i e molia i le fagogo Samoa. Mai le NUS le Soa Polofesa Tsujita, i le mataupu i le faatisiteina (digitizing) o faamatalaga i komepiuta ma auala faatekonolosi. O na faasoa eseese e atagia ai mea o loo faataua e talavou, i le latou sailiga o o latou faasinomaga, ma le isi itu, le ausu'esu'e matutua, i lu'itau tetele o loo ua tutu mai i o tatou faitoto'a.

Avea lenei avanoa e ofo alofa atu ai i uo ma pa'aga faigaluega sa feiloa'i i le fono a le OCIES. E lei manatu isi e toe feiloa'i ma o latou faia'oga na mafuta i Niu Sila, Ausetalia, a o a'o'oga ai, a ua avea le fono ma auala. Tofu lava le usufono ma se tala fiafia, ma se inati e foi ma ia. Maua foi ni uo fou e lei masani ai. E moni le upu a le fatusolo o W B Yeats, i lenei olaga, e leai ni tagata ese, na o uo e lei feiloa'i muamua i ai. Se upu ua sala faafoi mai. Manuia.

NIUPAC PUBLICATION

Email: ola-niupac@gmail.com
Phone: 02102567412
Facebook: [ola—puletini—a'oga](https://www.facebook.com/ola-puletini-a-oga)
Website: www.ola888.com

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA acknowledges and defends the rights of other copyright holders whose material we borrow and acknowledge accordingly.

NIUPAC 2011